

豐潤縣志卷之三

郝增祐受山

知縣牛昶煦謫如甬纂輯

周晉堃鐵珊

孝友

薄子所生則其餘可知士君子勲業爛然而門內多慚識者鄙之若夫編甿童穉一節之奇千百世猶低徊欲絕焉無他誠能及遠相感以天也豐邑如辛大漢之善養其母聶捷元之抱頸迎刃暨魏禮中王有德以下諸人皆足以增光簡冊牽連錄之一以覘此邦風俗之厚一以徵國家教化之隆云爾志孝友

明徐得道事親以孝聞親卒廬墓三年後築廬處土隆隆起高丈餘至今猶存

谷 選號北峯都御史嶠之父也行四敬兄如父析產後母悅與之同居善養有方母壽九十七

劉大本字尙質庠生事母孝及卒廬墓躬負土石築塚甚高朝夕拜泣有蛇兔馴擾之異

陳 金開平中屯衛千戶少家貧恒以不逮奉養爲憾待異母弟尤周摯弟沒撫其遺孤恩

養兼至

馬敬坊市里人性至孝母卒廬墓晝夜號泣不止鵲巢于廬狼宿于墓皆馴擾不驚巡按御史嘉其孝請免本里雜役鄉人德之

魏文傑年近古稀奉養老母備極周至人皆以魏孝子目之知縣劉佐旌其閭

按王舊志孝義傳錄孝子六人羅舊志只載徐得道谷選劉大本三人餘從刪削不知何所見也明史臚馬敬姓名而遺其事跡今悉依王志彙入邑乘足以信今傳遠惟其公而已事隔百餘年豈得以己意爲予奪耶

曹士真字金石庠生髫年失恃事繼母以孝聞知縣李爲樑旌其門曰孝嫗先賢

辛大漢辛家莊人赤面長鬚一飽斗粟舉數百觔物如弄丸性剛尙氣獨聞其母聲則垂首如伏雌家貧常不飽而奉母則無或闕爲人傭遇肉必減餐遺母歸必市菓餅母啖則喜偶不食則憂母卒鄉人爲市棺葬之大漢病未久亦不起蓋悲哀窮餓所致也邑人曹鼎望爲之立傳知縣吳慎有詩入文苑

王有德世居南村以農爲業父母早亡與兄有道相依如左右手兄老而鰥無子有德父事

之一日以飲食之故妻有怨言立出之婦翁謝之鄰里勸之不從兄泣曰日月既久異姓人有後言亦常情以我故棄而妻拋而子破壞而室家我則何安因不食有德偕其妻泥首謝過乃歡聚如初知縣吳慎有詩入文苑

國朝聶時彥時秀隨父慎任雞澤訓導父卒于官扶柩還舟次漳河遇寇搜財無得疑藏於棺將剖之時彥抱病被執時秀哀求不獲免乃奮臂大呼曰苟暴父尸何以生爲遂罵賊赴水死賊怒復欲殺時彥彥子捷元方十歲抱頸迎刃曰我可殺乞留父命賊義而釋之乃得抵里完葬

唐 晉字子封鉅族也父清心以德望名重當時晉幼失怙恃哭則泣血已啜粥飲水矣豐於貲而性質樸無膏粱氣束修圭潔行同寒雋育於長兄居仁事之如父出告反面銳事必稟命行不卽諾不舉也久之兄以他事涉訟逾年事且不測晉列諸生甫弱冠不避斧鑕事獲昭雪數萬金之產盡矣至鬻宅他徙無怨色終身不掛齒頰友愛老而彌篤時以絲竹陶寫年近九十無疾而卒

魏 鎬字君處入庠歸而母已卒哭則絕倒老而不廢事繼母如所從出撫異母弟無間言

三世不析產以食指多令各計口占田廬年甬四十遠歸而妻又死不再娶讀書別墅日夕忘歸如是者週一甲子孫曾非朔望不見也惟憐弟鏌早失母非對案不食弟亦盡禮歡洽夜臥必撫摩痾癢焉其爲風清望自畿東達遼左士大夫之行過者往往下車問訊怡然就道知縣王夢麟方檠如仰其耆傾時過從訪時政鎬惟蕘茗清談而已逾九十不釋卷抄古書細字日猶數幅夙興夜臥有常候子潛年七十一工色養父子肩隨倚杖臨風望若圖畫年正百齡康熙五十九年瞑而逝

魏禮中生員元章長子也八歲喪母時時背父繞墓號而臥耕者憐之負以歸父子同被口授小學語孟皆記不忘及人塾經書成誦久矣父侍祖疾於城時方十一當戶若成人十六通五經文藝可觀父猝瘋疾不起乃棄詩書採薪汲水獨肩勤苦延師訓弟昌齡爲諸生父病且十年年二十二始肯受室非間月不入也嘗言父未四十鰥居不娶恐繼母妬子今病入膏肓忍不伴起居乎父之轉側非禮中則不安親滌穢惡小焉者耳二十有四生子廣業慨然曰今後可隨事父母矣家道南而父居道北書室遂足不及閭無何弟得危疾臥西偏禮中日夜兩屋奔走不解衣不伏枕不交睫方假寐坐息而兩屋呼喚疊至

年餘困不支僱僕永壽侍疾嘔血滿堂仆地而死妻孥道南不見也永壽猶多睡往往中夜驚而走曰不敢不敢云被禮中夢中所毆如是數四懼而逃元章昌齡相繼半月死矣嗚呼豈真有鬼孝子耶

鄭奕均字又白國學生天性孝友事親終身不懈敦睦族誼代捐官賦鄉黨稱之

魯本質字素菴聊城令文鵬之孫州同經之季子也幼以孝聞長繼叔誥生爲嗣事孀母顧氏致敬盡禮依依承歡終身如一日卽顧亦忘其非已所生子也與堂兄弟析產義讓良田二十餘頃至今鄉族稱孝友者無不推素菴爲首云

楊思然行二兄弟五人析產已久思然仰體母志貧乏者時分給之

曹偉望字霽齋鼎望之六弟也性至孝幼隨嫡母歸寧外家父繼祖偶中痰疾信至星馳觸路槐而斃救之稍蘇聲氣斷續卽云父無恙乎生母患熱自求冰夜行百里外目不交睫數日鬚髮頓白矣泣血三年中未嘗見齒老撫面痕輒泣然曰此吾父疾時志也倡修祖塋石壩工力獨鉅嗟乎可謂孝子矣

董尙賓國學生年二十四歲其父庠生正倫歿尙賓哀號如不欲生廬于墓側三年知縣張

公題匾旌之

曹永藻國學生賦性純篤尤敦孺慕承顏養志恪盡孝道事其父錚壽逾九旬如一日焉父歿水漿不入口日夜哭泣哀毀骨立竟至殞生識者哀之

楊棟行三生母谷氏早亡繼母張氏棟事之至孝母疾百藥莫瘳棟割左乳羹以進疾即愈知縣王之勳旌以匾曰純孝格天後棟因家貧流寓京城施藥餬口有子名春第由大興籍中乾隆戊午舉人棟年八十三赴順天府鄉飲二次 賜冠帶人以爲純孝之報石天培秉性醞謹事親以孝聞父母之喪既葬廬墓三年知縣吳執中旌以匾曰純孝可風谷善寶其父懋嘗從其堂兄於江西永豐縣任所病故寄櫬興隆寺善寶時年十五聞訃痛哭曰父沒不能視殮天壤間罪人也匍匐五千里扶柩旋里形毀骨立君子難之

王振綱字整三邑咸寧里人事父以孝事繼母孺慕極篤士林高其行誼欲衆舉之受旌賞網以爲分內事固辭

魯崑貢生父卒繞墓興哀事繼母曲盡歡養族黨皆稱其孝乾隆三年督憲以匾旌之

魯機字升中貢生兄弟五人機居次父以二門乏嗣以機承祧事嗣祖以孝聞嗣祖沒析

居家業應分爲二機堅欲均分宗族援大義責之不得已從衆論仍讓五分之一臨終又以長兄年老囑致地一頃以供甘旨云

劉邦甯白沫莊人父疾將危甯捧湯一甌至語家人曰海上方也可愈父疾以匙送之父咽盡汗出旋豁然矣家人奇其方迫問之不答見其左臂護痛乃得其故焉此乾隆乙亥四月事也

曹永紹字繩其國學生甕安令錚之仲子也性至孝事親能曲盡歡養始終無間方正自持不妄交游惟以經書課子子六人榮廷槐樞極孟林枏各執一業並能不失家法

曹 鎮字豐年幼失怙恃伯兄鑄教養有方年甫十四補博士弟子員鎮亦能事伯兄如嚴父一切家政必稟命以行後因兄卒南和官署扶襯旋里葬祭竭誠迄今鄉黨宗族無不推其友于焉

宋 燦字星源刻志誦讀書法肖歐陽率更家雖貧而啜菽飲水色養怡怡父母恒相謂曰有子能孝我二人亦可以無憾矣設教於鄉得脩脯以供親膳親沒之日涕零皆血哀毀骨立旋卒

吳邦彥字美谷邑庠生中門莊人性孝友順治年邑令李公爾蕙頒孝友可風匾額以嘉之
補遺

王鱗昌字漣泉邑北關人乾隆甲寅科舉人家無恆產性甚友愛有弟四相繼沒教讀於家
得修金必分給諸弟婦撫侄男女如己出每念亡弟常零涕焉著有目耕堂文集行世卒
年六十八

陳廷桂字殿一小港人幼時家貧甚作小經紀以養母母賈氏性嚴厲稍不當意即笞之桂
長跽待罪俟色霽乃起或在別室聞母呼喚聲致心悸失箸晚年業小康孝敬倍曩日白
鬚垂垂猶依依如赤子焉母壽至百有二廷桂亦九十九歲卒

徐獻文黃各莊人幼而失恃父敏樹負販遼東久不歸文事祖母暨兄嫂勤順罔迨祖母
與兄嫂相繼歿文盡產營葬畢出關尋父備歷艱辛迎歸奉養年五十以勞疾終

丁永沛字潤之邑庠生青坭人父歿事母孝待諸昆友於甚篤且制行高潔鄉里咸欽敬焉
谷 棠庠生西關人同胞四人年最少家貧養親無資教讀爲業以脩金奉甘旨親病侍湯
藥至廢寢食親沒葬如禮後稍有積蓄卽贖濟侄男女以助婚嫁宗族鄉黨皆稱之

賈子立王蘭莊鎮人家無立椎惟日傭工市甘旨以奉母嘉慶中頻年饑饉立隨衆瀕海販鹽爲邏者所獲囑以誣陷富民立曰此傷大理之事某所不爲且歸家無以見母及堂訊官憐而釋之管營田官繆公題其門曰孝義可風鄉里有貧者孝母賈子立富者孝母董天威之語天威邑庠生自有傳

董暄字德華增廣生宋家營人性磊落尤篤於孝嘉慶癸酉在某王府教讀得家報父扶乾病亟時值林清之變京師戒嚴九門俱閉且府中不容他適因在館焚香稽首祈禱已壽十年增父十日期得相見是夕起坐不安焦灼終夜次日鬚髮盡白及嚴解三百餘里一晝夜抵家侍湯藥十日乃翁卒同邑光祿卿鄭家麟爲之傳且歌白鬚行以美之歌入

文苑

李儒勇王蘭莊農人也母蕭氏年八十猶強健後得疾昏瞶不解人事起臥需人每便溺勇躬自滌拭頃刻不離數年無怠色母卒哀慟異常求善地葬之

鄭宣邑諸生有孝行父患痰疾常在牀蓐宣服勤左右凡進飲食滌穢溺等事皆身任之或遇戚友慶弔有不得不身往者出必告返必速慮無人善事親也父病臥八年夜夜伴

宿始終如一日宋家營鹽運分司某公嘉其孝以匾額旌之曰純孝可風

吳 雙中門莊人十餘歲時其父患時症已劇夢食人肉而愈醒爲雙言之雙卽暗割股肉作羹進父食訖病若失因見雙帶痛苦狀研詰之以實告識者聞而歎曰童年有至性孝哉吳氏子也此道光中事

畢成銀邑之西河村農人也少孤母目雙瞽成銀日爲人傭工得錢卽備甘旨以奉母自給不暇屢至枵腹母嘗語人曰我有是子不覺貧也並不覺目之瞽也成銀年六十母猶康健數十年如一日鄉里感泣以爲僅見事

鄭 濂字月洲貢生世居邑之鄭家莊性孝友品端學粹尤耽吟詠出嗣伯父送終事畢仍侍本生父母與兄弟同居後生齒既繁家計亦索以舌耕爲一家生葬資篋瓢屢空晏如也年九十四卒刊有拙翁遺詩行世

石有聲事親至孝親歿廬墓三年兼有文學里人有刻其所作墓誌者至今猶稱爲石孝子焉

劉作楷趙官莊人也家貧而孝妻徐氏亦淑慎無違母患痰疾醫者云疾不可爲子又貧甚

徒費藥餌無濟也楷弗聽典產鬻器延名醫市良藥偶不足其妻以衣飾佐之而母病終不效夫妻更番守視不離床蓐者數年並虔禱於神願以身代母歿後楷亦尋歿嘉慶中寶坻貢生徐振聲作贊以美之謂夫爲孝子妻爲孝婦焉

王福林桑坨莊人生數月父出關生理二十年無家書向母詢知父之年貌隻身東行徧覓之數年弗遇恐母之念已也歸而慰之未幾又出關徧覓仍未遇如是者三途次遇顛險耐凍餒不知凡幾後至江東遇一人面貌與母言合第衰老有病詢之果其父也奉之歸里不數日父病歿林哀毀幾不欲生里人咸歎美之

趙有鄰小嶺子莊農人家綦貧而性孝悌父病篤焚香籲天願減己算增父壽父既沒因兄有妻子祖遺之物悉讓與兄後爲人傭工稍有積蓄卽爲侄授室以綿宗祀終身不娶而卒

張克儉字節侯李家莊人幼時家貧父訓蒙於外儉爲人牧畜所裹餼糧悉以遺母長爲商獲利歸必一一陳几榻以博父母歡其弟兄諸邑庠生勤學嗜古嘉慶元年奉九表嚴親親赴千叟宴往復衣不解帶者月餘尤好行義舉本邑童試舊無公設棹橙諸首倡捐資

多爲置備立碑於文廟以記之應試者至今稱便焉

張 霽字嵐暉邑庠生張各莊人壯歲父母相繼卒歡粥寢苦哀毀骨立廬墓三年終身不與兄析產兄卒事嫂撫侄胥盡其道爲人慷慨好義精醫術施藥濟人從無德色年六十以疾終一鄉爲之罷社

李哲字福疇爽坨人幼家貧而性甚孝友四歲時即知懷橘讓梨及長作小經紀得旨甘必以奉母後因服賈獲利家稱小有奉養益隆母歿時哲年五十四嘗至墓下哭奠形銷骨立因此致疾至五十八歲卒

徐恩慶國學生父明倫賦性醇良鄉里重之恩慶生而孝友爲人恂恂謹飭有其父風玉邑孝廉王慶元題其室曰孝友醇良年未及艾卒遠邇咸惋惜焉

高 鴻字蘆洲邑庠生本城鎮人少失怙恃事繼母以孝聞待異母弟能友愛設教於家從遊皆一時名士年七十卒

甄雨城北泉水頭人道光二十五年大水沿河廬舍湮沒幾盡雨適出外工作急歸家負母狂奔未里許水如排牆至兩自分必死忽有物類犬彘旋繞其旁水退母子俱無恙人以

爲孝行之報云

魯鳳增字子重本城人家清貧祖父衰老孝養無虧事母尤謹待諸昆弟亦厚生養死葬獨任其勞爲同胞兄弟治生業授家室凡親族冠婚喪祭皆極力助之自奉極儉祭祀必豐每逢父母忌辰年久猶涕零不已壽屆古稀卒里黨以孝友稱之

張懷倉張陸莊人七歲失怙母宋氏晝夜紡織以爲生計然性甚嚴厲倉小有過輒鞭撻之倉長跽待罪必母顏霽而後起母病親侍湯藥不解帶者累月母卒葬如禮書父母神主以奉之朝夕哭奠十餘年如一日至今鄉人猶盛稱節母孝子云

丁烈字振遠本城鎮人生母氏范家訓極嚴烈曲意事之始終如一日與邑名士鄭之鍾同僦居谷氏宅人有一院兩孝子之目

魏禮焯字懷齋乾隆庚寅舉人太守元樞三子也童年失怙以遺命未葬生母劉教之嚴遵率唯謹及葬父廬墓三年不豫外事母死亦如之由揀發宰濟陽士民謳歌徧里巷以鯁直忤上官去職未幾起復歷任山左三縣治績如初致仕歸設義館一區以教戚里之貧困者迄老猶論文不倦出其門者率一時名流子二長士堂舉人次士坦諸生皆文學有

聲

監生董天威字覲廷王蘭莊鎮人事寡母以孝聞且恪遵母訓至其門者不聞聲欸聲蓋一舉足一出言均不敢忘也母年高體胖每食多茹暈威嘗婉勸之母曰我素知醫豈不自防顧內燥非此無以滋津液汝勿慮也後威亦以醫名蓋得於母教云

趙從餘字禮耕趙茂莊人幼失恃事父孝事兄亦恭順父染沉疴服藥罔效日哭奠於神祈以身代淚盡繼之以血夜夢神授以良方父服之果愈嘗從兄駕舟至澗河午潮初落舟將隨潮入海兄自恃有力下舟挽之稍一失手已滅頂矣從餘故不習水以救兄情迫一躍入水挽兄登舟兄謂人曰自今以往之年皆弟賜也厥後家道日裕遇歉歲施粥以濟鄉里人有稱貸量力應之數年不下萬緡悉焚其券有孫二福綏福海皆諸生亦長厚可風克承先緒焉

孟青雲邑諸生小河各莊人天性敦篤藹然孝弟應童子試時其母在家得暴疾家人恐誤其考試也既卒而後訃告之雲在旅邸寢不安席急趨至家哀慟迫切死而復甦者再且事兄如嚴師偶有過輒跪受譴責兄寢疾親奉湯藥衣不解帶者累月兄卒哀毀失形飲

食俱減不數月亦相繼而逝

王熊飛八品銜胥各莊人自奉儉約而奉親頗豐腆親沒盡典祖遺田產爲殯葬資後以居積致富持家有道子孫守其遺範爲邑南望族焉

何士斌字雙印武庠生邑北下莊人早失怙事繼母葛氏極孝凡事必稟告始行時雖盛怒母一言即釋爲母循例請糕旌經永平守游公予以節比松貞額建坊後州牧何公邑令諡公皆製楹聯以獎之

劉治字琴堂劉家莊人性仁孝幼失恃事繼母恭順無忤容父嘗患心疾發輒歌呼狂走迄無定蹤遇鬻糕餅棗梨者不問卽食治時負錢囊追隨其後詢知父欠債處卽取償之以故父在外無饑渴亦罔有蹉跌有幼弟因父病失教凡飲食訓誨皆身任之旣而家漸落弟亦夭折父病益劇有時狂辱鄉人治必負荆謝過人皆諒之至有感動泣下者父卒哀毀異常繼母卒喪葬盡禮治一生精歧黃術尤長於痘疹延請者踵相接未嘗以事辭人有餽遺皆卻之且每以藥餌濟人無德色生予際唐丙子成進士授河南葉縣令

王崇德武庠生邑南關人天性友愛年十六失怙家無儋石竭力事母誨弱弟五人皆成立

子其光邑庠生病卒逾日忽蘇曰吾父有陰德不應絕嗣故得復生也逾五年沒遺孤僅三歲媳傅氏事翁教子克盡其道崇德壽屆八十餘其孫開勛今已名登爨序矣

孫兆啟新河莊農人也家酷貧父早卒啟傭工以養母母卒又傭工以贍兄弟年既衰無以自養族人有恤其乏者則受之無亦不乞貸竟偃臥長餓以卒

楊體撰邑諸生新軍屯鎮人性純良事繼母孝待異母弟友于甚篤終身不妄交遊不識爭訟讀書設教鄉里稱爲道學先生

楊紹文字繼周邑西南小唐莊人天性綦篤事親能竭力父母有過必多方幾諫改而後止家貧棄儒而賈業小康親沒弟欲析居悉以沃產給之無何弟業盡文復與合爨待侄輩如己出越數載文以服賈得利田產倍增弟又求析文慨然與之均分毫無難色凡鄉鄰有貧苦者必量力周恤之妻年近五旬忽舉一男名朝楨文卒時已入邑庠矣

沈耀南字星垣廩貢生候選訓導本城人學問優長性情和藹事親承顏順旨有弟二衣食互相推讓始終雍睦無間言有妹一適那母莊陳姓未期年而寡居時以爲憂南三五日輒往視妹或令妹常依母以慰母心迄今鄉里猶稱其友愛焉

劉閣書邑庠生爽垞鎮人幼失怙母朱氏教誨有方每負笈從師輒依母傍徨不忍去讀書至問孝諸章必再三潛玩甫遊泮母有疾晨昏省視至廢寢食如是八月母卒殯後一日聞風雨聲劇至墓下痛極而卒其妻李氏守節至今五十一歲

高永福何各莊人道光中春杪母病甚劇計無所出因割股肉和藥以進母疾若失越五年母卒思母情切哀毀致疾亦歿

陳恩慶字會亭幼多疾而性孝友因父久病不痊身又攣疾常禱神願以身代長事兄尤謹三十餘年未嘗一言相忤凡財物不與兄計多寡今鄉黨稱悌弟者猶樂談恩慶之恭遜焉

陳希虞字印華恩貢生本城人優於學尤篤於行出繼伯父爲嗣家計不豐奉養與所生無異入泮後以舌耕爲業因生父貧苦思稍爲接濟而嗣父持家故嚴不敢明言乃自減衣食銖積寸累以遺之生父賴以溫飽教人先品行而後文藝生徒數十人其中多名士焉王致敏號捷亭邑東關人家不豐裕而事母以孝聞事無大小必稟承母命母患瘡疾身侍湯藥親自洗拭夜夜焚香願移紀增母壽母果愈鄉有某欠敏銀將討之母囑以切勿迫